

ACTIVIDADES "Pineiróns" REALIZADAS DURANTE OS ANOS 1998 - 99

A primeira que levamos a cabo foi a: **DOAZÓN DUNHA CAMPÁ PARA A ANTIGA IGREXA DA ILLA DE ONS.**

A ANTIGA IGREXA DE ONS

Atópase no barrio de Canexol e aínda que non está clara a data da súa construción, os expertos falan de principios do século XVIII e que foi elevada onde antano había outra Igrexa da que nos falou... Sa Bravo

Ten unha posición extratética, mirando á entrada da Ría de Pontevedra e que pode ser observada polos mariñeiros que faenan entre a Illa e a península.

A Campá orixinal desapareceu a finais dos anos sesenta ó quedar relegada esta Igrexa coa construción dunha nova no barrio de Curro.

Ó carón da chamada ós fregueses nos día de culto, a campá tiña outras prestacións, entre elas destacar a de avisar de calquera desgracia, naufragio, ou a de orientar ós mariñeiros cando de súpeto se pechaba de néboa e collía ás dornas no mar. As badaladas da Campá dirixían ós mariñeiros cara á Illa.

Levou a cabo no verán do 98. O noso Vicepresidente, Lino Pazos Pérez, foi o donante. O acto tivo lugar na Illa de Ons no mes de xuño, cun acto de entrega extraoficial celebrado no barrio de Curro, onde Lino Pazos fai a doazón da CAMPÁ á Presidenta e Vicepresidente da Asociación de Veciños "Illa de Ons".

Posteriormente e ó longo dun xantar de confraternidade nun restaurante da Illa, fíxose a doazón oficial.

A CAMPÁ foi estreada o día da Festa de San Xoaquín.



Acto de entrega da Campá.

CHARLAS NOS CAMPAMENTOS E CAMPOS DE TRABALLO DA ILLA DE ONS

CAMPAMENTOS

Estes campamentos celébranse co obxecto de facilitar á xuventude a participación en actividades de tempo libre. Na Illa de Ons celébrase baixo a modalidade de Aula Natureza - Aire Libre.

Os obxetivos son que os rapaces teñan un encontro coa natureza, coñecendo a flora e fauna da Illa, a través da realización de actividades: técnica de acampada, marchas, orientación, traballos de corda, charlas,...

As idades dos participantes está entre os 13 - 15 anos e realízanse durante os meses de xullo e agosto.

O Secretario da Asociación e un dos máis ferventes investigadores sobre a cultura desta engaiolante Illa, Tino Pardellas, impartiu ós rapaces dos Campamentos e ós xoves dos Campos de Traballo unhas charlas socio histórico naturais sobre a Illa de Ons.


A súa exposición consistiu nun percorrido pola Illa visitando todos aqueles lugares (Laxe do Crego, Rectoral, Castro e Cova dos Mouros, Buraco do Inferno, . . .) que falan sobre a historia, costumes e os ritos da Illa. Tamén realizou un repaso pola economía da Illa de Ons, comezando pola instalación dunha Fábrica de Salgazón e rematou explicando o cambio que supuxo o paso dunha economía agrícola a outra pesqueira.

Por último fixo un percorrido por distintos aspectos sociais, turísticos, gastronómicos e mesmo arquitectónicos, xa que Ons ten a mellor arquitectura popular mariñeira aínda conservada de Galicia.

CAMPOS DE TRABALLO

Teñen como obxectivos a plantacións forestais e ornamentais. Limpeza da Illa (praias, sendeiros, camiños,...). Apoio á vixilancia contra incendios, en colaboración coa Consellería de Medio Ambiente.

As idades dos xoves vai dos 18 - 30 anos e realízanse nos meses de Xullo e Agosto.



Tendas do Campamento de Ons.

EXCURSIÓN Á ZONA DE FERROL

Debido a que Pineiróns é unha Asociación pluriprovincial e que os membros da directiva viven en diferentes provincias galegas, decidiuse realiza-las reunións de Xunta Directiva en cada un dos lugares de residencia dos directivos.

Unha delas celebrouse en Ferrol e aproveitouse para invitar a tódolos socios a realizar unha excursión cultural de fin de semana por esa comarca.

Fíxose un percorrido histórico - gastronómico, visitando, entre outros lugares, o Castelo de Moeche e o Santuario de San Andrés de Teixido.

O noso anfitrión, o vocal Carlos Moreira, fixo de guía por toda a comarca ferrolá.

Tamén houbo degustación dos produtos típicos da bisbarra, indo a rematar saboreando o famoso Polbo de Mugardos.

CASTELO DE MOECHE

Fortaleza medieval situada no concello de Moeche, na provincia da Coruña a 24 Km de Ferrol.

Pertenceu a don Fernando Pérez de Andrade, o Boo.

Consérvase en bastante bo estado, o mesmo o adarve e defensas exteriores que a torre do homenaxe, de planta rectangular e abovedada.


É un bo exemplar de últimos do século XIV, con obras posteriores do século XV.

SAN ANDRÉS DE TEIXIDO

O Santuario de San Andrés de Teixido, xa existía no século XII. Pertenceu á Orde de Malta e a Encomenda de Portomarín. O edificio actual é dos séculos XVII e XVIII.

A poucos metros do santuario, está a Fonte do Santo, de tres canles, dos que os romeiros tiñan que beber.

Tamén acostumaban a botar un anaco de pan, se aboia era presunción de boa sorte pero se afundía traería mala sorte.



Castelo de Moeche.

ACTIVIDADES "Pineiróns"

Agradecemento a:

Papa Golf

INTERNATIONAL CULTURAL DX GROUP

APARTADO 83

36900 MARÍN - PONTEVEDRA
(España)

PEREGRINACIÓN A SANTIAGO DE COMPOSTELA

Como Asociación inscrita dentro do Rexistro de Asociacións Promotoras do Camiño de Santiago, e como amantes do mundo mariño que somos a maioría dos socios, programouse unha peregrinación pola Ruta Xacobeá Marítima, incluíndo nela ás illas atlánticas de Cíes, Ons e Sálvora.

Distintos acontecementos xurridos; temporais ou mal estado do mar; ... e problemáticas de última hora, fixeron que a peregrinación marítima non se puidera levar a cabo.

Elo motivou a preparación doutro xeito de Peregrinación, quedando a marítima para outra ocasión.

O xeito elixido foi o Tren, acudindo os socios

dende os seus distintos puntos de residencia en Galicia. Asistiron unha grande maioría dos Socios.

Despois de cumprir tódolos requisitos necesario para gana-lo Xubileo, fixemos a ofrenda ó Apóstolo do símbolo da nosa asociación a "PINEIRA".

Posteriormente dimos un percorrido cultural-gastronómico pola zona vella de Santiago.



Peregrinación a Compostela.

FORMACIÓN DA ASOCIACIÓN XUVENIL "OnsOnza"

A asociación "PineirÓns" está inscrita dentro do "Rexistro de Asociacións Prestadoras de Servizos á Xuventude", da Consellería de Familia, Muller e Xuventude, debido a que, entre os seus Fins, constan os tendentes ó desenrolo cultural de nenos, rapaces e xoves.

Os fillos dos socios, ata os 18 anos, eran considerados socios xuvenís, con tódolos dereitos, con voz pero sen voto nas asembleas, sen pago de cota algunha e participaban nas actividades e nas programacións desta.

O ano pasado, coincidindo co primeiro aniversario de "PineirÓns", os xoves da asociación decidiron crear a súa propia Asociación Xuvenil, pero camiñando e compartindo xuntos (PineirÓns- OnsOnza) obxectivos e actividades.

REALIZACIÓN DUN DIAPORAMA SOBRE A ILLA DE ONS

No mes de Marzo do 99, coincidindo coa Semana Santa e a presenza en Ons dunha maioría dos socios por mor da presentación do nº 0 da Revista "AUNIOS", a sección xuvenil de "PineirÓns" decidiu, contando coa colaboración do noso secretario, Celestino Pardellas, presentar á Dirección Xeral de Xuventude un Proxecto que consistía nun diaporama sobre as diferentes peculiaridades da Illa de Ons e que podería ser un magnífico complemento lúdico didáctico para os compoñentes dos Campamentos e Campos de Traballo que se realizan en Ons.

ACTIVIDADES "PineirÓns"

Agradecemento a: Asociación Cultural



Ateneo Santa Cecilia

No mes de xuño, xa constituída legalmente a Asociación Xuvenil "OnsOnza", chégase a un acordo coa consellería de Familia e Xuventude que, por medio dun convenio, subvencionan a realización do Proxecto de Diaporama sobre a Illa de Ons.

Organizados e ben coordinados, tómanse datos e fanse as diapositivas. O resultado, rematado e entregado no mes de Xaneiro do 2000, é un diaporama dividido en sete bloques temáticos:

a) Xeografía e Historia; b) Fauna; c) Flora; d) Arquitectura; e) Ons, excelente marco para unha educación ambiental; f) Malacología; g) Economía: Agricultura e Pesca do Polbo.

Cada bloque consta de 15-30 follas explicativas; 20- 40 diapositivas ; fotos e esquemas.

O nivel empregado no texto é medio, nin alto para os rapaces dos campamentos (8-14 anos), nin baixo para os xoves dos Campos de Traballo (18-30 anos).


Foi eloxiado pola Directora Xeral de Xuventude e coidamos redundará nunha mellor programación das actividades dos Campamentos e nun mellor coñecemento desta engaiolante illa galega.

EDICIÓN DA REVISTA CULTURAL "AUNIOS"

Un dos proxectos máis ambiciosos da nosa Asociación foi a edición dunha revista onde quedara reflectido ese mundo tan engaiolante como é a nosa rica cultura popular galega, ó carón, de aspectos científicos, históricos, acontecementos, . . . , gastronomía, sempre tratados desde o seu aspecto socio- cultural.

O proxecto presentábase difícil, somos unha asociación non lucrativa e, un dos nosos principios obxectivos, é conseguir a gratuidade de todas as actividades, por iso, houbo que poñer unha grande dose de atrevemento e valor para pedir a comerciantes e amigos as doazóns necesarias para que saíra á luz unha revista cun mínimo de calidade de impresión e que, a súa distribución, puidera ser gratuíta.

AUNIOS



sobre a Pineira molusco que se da en Ons en grandes cantidades; sobre os portos de Marín e Vigo falan Xulio Pardellas e López Dóriga; o toque poético estivo a cargo de E.V. Calo; e por parte dos membros da Asociación, fíxose a presentación e déronse a coñece-los seus fins e obxectivos.

Por ser unha asociación que naceu na Illa de Ons (Ría de Pontevedra) decidimos que o primeiro exemplar (nº 0) de presentación, estivera dedicado, na súa maior parte, a esta Illa pontevedresa.

Para iso, puxémonos en contacto con persoas vinculadas ó mundo da cultura e da investigación que tiveran algún tipo de contacto coa Illa, de aí saíron artigos como os de: Fernando Alonso Romero , Santos Pena, Lino Pazos e Tino Pardellas que nos falan sobre o Trasno, a chegada á Illa como profesional da ensinanza, sobre a súa ermida e sobre o costume de Varea-las Dornas; outros articulistas, inda que non directamente, tamén tocaron o tema da Illa cos seus artigos sobre o Baño das Nove Ondas da Lanzada de Miguel Besada, Ricardo Arnaiz



Presentación da Revista nº 0. Illa de Ons.

*Asociación Cultural
Ateneo Santa Cecilia*



HIMNO DOS Pineiróns

Síntome feliz
son dos Pineiróns
Pontevedra, Ourense
Marín, Grove, Vigo
Bueu e Ferrol.

Síntome feliz
son dos Pineiróns
como, bebo, bailo
canto, vivo a vida
sóbranme ilusións.

No berce noso,
lugar fermoso
Illa de Ons,
naceu un grupo
de xente alegre
é Pineiróns

Alonxo penas
quero alegría
disfruto en Ons,
fora tristezas
veña amizades
son Pineiróns.

Síntome feliz
sóbranme ilusións
como, bebo, bailo
canto, vivo a vida
son dos Pineiróns.

Música: "Adios a
Jamaica". Habanera
Autor: Descoñecido
Letra: Mac Mayán

Onº 0 saú do prelo no mes de Marzo e foi presentada na Illa de Ons na Semana Santa. Tivo un enorme éxito, foi distribuída a Centros de Ensino (universidade, institutos, primaria), Bibliotecas, Organismos Oficiais, Museos, Asociacións Culturais, Centros da Terceira Idade, Patrocinadores, . . .e, en xeral, a todos os que nola pediron. En dous meses quedou esgotada.

REVISTA "AUNIOS" Nº 1

O éxito alcanzado coa revista de presentación (nº 0) animounos, xunto á tamén boa acollida das casas comerciais anunciadoras, a prepara-lo nº 1 para a súa saída de cara ó verán.


A empresa non era doada, só contabamos con tres meses, pero a nosa ilusión e, por mor da grande cantidade de articulistas que se animaron a colaborar, puidemos sacar no mes de Xullo o nº 1 da "AUNIOS".

Neste número Carlos Moreira, Laureano Mayán, Cruz Senra, Jesús Maquieira e Santos Pena adentráronnos nas belezas de Ons e nas primeiras experiencias como mestre; Lino Pazos, Ruiz Guirado e Manuel Figueiro contáronnos as súas experiencias e investigacións sobre as illas de San Cremonço, Tambo e San Simón; a parte poética estivo a cargo de E. V. Calo e Angel Mosquera; de O Grove, a súa arqueoloxía, o Tarno e sobre as fontes de San Vicente escribiron Javier Fernández, Miguel Besada, Anxo e os nenos do colexio das Bizocas; Torres Viqueira defendeu o patrimonio arqueolóxico de Marín; Joaquín Cobo e López Dóriga charlaron sobre os portos de Marín e Vigo; gracias a Malet coñecemos a Heráldica dos concellos da Ruta Xacobeá Marítima; na parte gastronómica Xavier Barreiro alimentounos coa Cociña Celta e o Bandullo de Ons; Luis Barcia dende Ferrol aconsellounos sobre a Biomasa; e Tino Pardellas colaborou con artigos nos anuncios de O Polbo e os Calamares da Ría.

Inda que foi repartida nos meses de Xullo e Agosto, a súa presentación oficial tivo lugar no Casino de Marín o día 24 de setembro de 1999. O acto estivo presidido por membros da directiva e polo presidente do Liceo Casino de Marín.

Ó acto de presentación acudiu numeroso público, entre colaboradores, anunciante e invitados. Tamén tivo lugar a presentación de dous libros escritos por membros da Asociación, concretamente o libro " Isla de Ons" escrito por María Jesús Otero Acuña e " As Ermidas Illeiras nas Rias Baixas" de Lino Pazos Pérez.

AUNIOS



Presentación da Revista n.º 1. Liceo Casino de Marín.

ACTIVIDADES "Pineiróns"

Agradecemento a:



LICEO CASINO
MARÍN